

Ocho persona lo ser honrá durante manifestacion cultural riba Plaza Libertador Betico Croes

ORANJESTAD - Diasabra venidero lo tuma lugar riba Plaza Libertador Betico Croes, e manifestacion cultural, relacioná cu celebracion di Dia di Himno y

Bandera.

Durante di e ceremonia aki, lo bai rindi homenahe y reconocimiento na ocho persona di comunidad, kendenan a cumpli grandemente cu socie-

dad di nos pais atraves di añanan

Ta trata di personanan cu riba diferente tereno a destacá y cu Comision Celebracion Dianan Nacional, a ser recomendá pa ricibí e reconocimiento aki.

Ta trata aki di e organizacion di Women's Club of Aruba pa su servicio social presta na comunidad atravez di añanan cu a pasa.

Riba tereno di deporte lo bai duna reconocimiento na tres figura masha conoci riba nos isla, y kendenan a representa nos pais internacionalmente den diferente ramo di deporte.

Ta trata aki di Juan Maximo Pablo, mihor conocí como

Juancho Pablo, kende a destacá enormemente riba tereno di futbol, tanto pa su ekipo Dakota como pa seleccion di Aruba y tambe di Antiyas.

Eduard A. Ras, mihor conoci como Eddie Ras, conocí como un di e mihornan tenistanan cu Aruba a yega di conocé, kende a destacá tambe riba tereno di futbol y baseball y den tur e ramonan aki di deporte, a yega di representa colornan di nos bandera den exterior.

Ruben Philips kende pa hopi aña a destacá riba tereno di baseball y despues a presta tremendo servicio na e deporte aki riba tereno di umpire.

Pa loke ta turismo lo duna reconocimiento tres persona kendenan ta Jetty Tjung, Eduard Rodgers y Louis Zschuschen kendenan a hunga un rol grandi den desaroyo turistico di nos pais.

Otro persona cu lo ricibí reconocimiento e anochi aki, ta Errol Brown pa su logronan riba tereno social y comercial.

Un invitacion ta bai di parti di Comision Celebracion Dianan Nacional, pa asistí e anochi aki caminda fuera di lo rindi honor na nos Himno y Bandera, lo duna reconocimiento tambe na algun di nos hendenan, pa nan dedicacion y aporte na desaroyo di nos pais.